



Jumat, 31 Maret 2023

Ogen: Johanes 19:25-27



Pusuh Nande



Mbar beritana kematen brigadir Josua i bas media sosial. Seh asa genduari pe proses pengadilan tetap denga erdalin. Tupug siperdiateken arah media sosial uga beratna pusuh nande Josua ngalo-ngalo kematen anakna, si la semal jadi man sekalak jelma. Mate erkiteken ianiaya ras ibunuh. Erbage penggejapen si lit i bas nande Josua paksa si e. Tangis la erngadi-ngadi nuduhkan kecedan ate si mbages kal, merawa kal atena tapi lenga ietehna ise si man rawan, ngelawan atena, si man lawanen e kalak si mbelin. La lit gegehna tapi berontak i bas pusuh. La terturiken alu kata-kata uga penggejapen nande e, arah lalana iluh mambur, em si nuri-nuri kerna sedak i bas pusuh.

Maria nande Jesus pe nggejapken si bage rupana, tupung ia tedis deherken salib Jesus. La terturiken kecedan pusuhna natap anakna ipakuken i kayu persilang, la ietehna kai salah anakna e, la lit gegehna guna nampatisa, ndeherisa kal pe ku kayu salib e la lit kesempatana. Entah iemana nge min atena nahe anakna e tapi la ibereken kesempatan e man bana. Iluh mambur e me si nuri-nuri kerna kecedan atena.

Situhuna ngikut-ngikut Jesus seh ku proses penyalipen e bahaya man Maria ras teman-temana erkiteken banci icap tentara Romawi e teman (ajar-ajar Jesus) janah ia pe bujur itangkap ras ipakuken ku kayu persilang. Tapi teridah i bas Maria ras temanna la lit kebiaren nandangi ancamen si banci jadi man bana. Iikut-ikutna Jesus seh ku proses penyalipen e erkiteken keleng ate ras kesetianna man Jesus. Amin pe nina kalak Jesus e kena kutuk, la ngurangi kekelengenna. La ia mela ngakuken Jesus e anakna ras guruna. Keleng ate tuhu-tuhu lit i bas pusuh Maria.

Keleng ate e naluken kebiaren, keleng ate e pang nanggung resiko. Keleng ate nande, kai pe igengkenna guna anakna.

